

Naqqiut

Allannguutissatut siunnersuut 15. november 2017-imeersoq taarserpaa

(Makku naqqiutigineqarput, “Sanaartornermut ataatsimiititaliamit saqqummiunneqartoq” imaalillugu “Naalackersuisunit saqqummiunneqartoq”, kiisalu oqaaseqatigiiliornerni kukkunerit

Uunga

Allannguutissatut siunnersuut

**Uunga siunnersuut: Nalunaarasuartaatitigut attaveqatigiinneq aamma
nalunaarasuartaatitigut sullissinerit pillugit Inatsisartut inatsisissaat nr. xx, xx. 2017-
imeersoq**

Pingajussaaneerinerimut Naalackersuisunit saqqummiunneqartoq.

§ 2-mut

1. § 2 ima oqaasertalerneqassaaq:

” § 2. Kisermaassinermut § 1, imm. 1-imi taaneqartumut ammanerulersitsineq pillugu Naalackersuisut aalajangiisinnaapput.

Imm. 2. Nalunaarasuartaateqarnermi kiffartuussiviit uku ammanerulersinneqarput:

- 1) Paasissutissat ingerlaarnerinut kiffartuussivik.
- 2) Internetimik kiffartuussivik.
- 3) Radiukkut TV-kullu aallakaatitanik siaruarterineq.

Imm. 3. Nalunaarasuartaateqarnermik attaveqatigiinnermi atortut uku ammanerulersinneqarput:

- 1) Silaannakut aallakaatitsinerimut attaveqatigiinnermut atortut.
- 2) Radiukkut TV-kullu aallakaatitanik satellitikkut tigooraasinnaanermut attaveqatigiinnermut atortut.
- 3) Radiukkut TV-kullu aallakaatitat siaruarternissaannut attaveqatigiinnermut atortut.

Imm. 4. Imm. 1-imi nalunaarasuartaatitigut atortut, pilersuisut atuisullu akornanni attaveqaatit naapiffiisa (nettermineringspunkt) akornanni imaluunniit illoqarfiit nunaqarfiillu akornanni aammalu nunanut allanut atortut elektroniskiusut atorlugit attaveqatigiinnissamik ajornarunnaarsitsisut pineqanngillat.

Imm. 5. Naalackersuisut nalunaarasuartaatitigut attaveqarnermut imm. 4-mi taaneqartut ammanerulersinneqarnissaannik aalajangiisinnaapput, tassani teknologi pineqartoq silaannakut aallakaatitsissutit atorlugit nuussisarneq aallaavigineqarpat, aammalu taamaallaat illoqarfiit

imaluunniit nunaqarfiit ataasiakkaat iluanni atorneqartussatut naatsorsuussaappata.

Ammanerulersitsinissaq aalajangiunneqarpat Nalunaarasuartaateqarnermi Aqutsisut (Telestyrelsen) pisuni immikkut ittuni teknologimi pineqartut atortut kabelillit atorlugit atuinissamut immikkut ittumik akuersissuteqarsinnaapput.

Imm. 6. Naalackersuisut nalunaarasuartaatitigut kiffartuussinerit aamma nalunaarasuartaatitigut attaveqaatit ammanerulersinneqartut pillugit maleruagassanik aalajangersaassapput.”

Allannguutissatut siunnersuummut oqaaseqaatit

Nassuiaatit nalinginnaasut

Nalunaarasuartaatitigut attaveqaatigiinneq aamma nalunaarasuartaatitigut sullissinerit pillugit Inatsisartut inatsisissaattut siunnersuut ull. 2. oktober 2017 siullermeerneqarpoq.

Siullermeerereernermi inatsisissatut siunnersuut Sanaartornermut ataatsimiititaliamit suliarisassanngortinneqarpoq, ataatsimiititaliarlu aappassaaneerinissami atugassamik isumaliutissiisumminik saqqummiussaqqarpoq. Isumaliutissiisummi Naalackersuisut ataatsimiititaliamit kaammattorneqarput, radiukku TV-kullu siaruarterisarneq pillugu periaaserisartakkat atuutereersut pillugit ilanngussinissamut allannguutissatut siunnersuummik saqqummiussissasut. Tamatuma saniatigut ataatsimiititaliap maluginiaqquaa § 36-mi aalajangersakkamik amigaateqartoqarunarmat, tassanilu pineqarput sinaakkutit il.il. siusinnerusukku inatsisitigut tunngavilereerneqarsimasut.

Sanaartornermut ataatsimiititaliap siunnersuummik suliareqqiinermini maluginiarpaq oqaatsit sisamat § 2, imm. 1-imi ilaatinneqartut aalajangersakkap angusinnaasaanik siunertaanngitsumik killiliisuusq.

Taamaalilluni aalajangersakkap allaqqinnissaata pisariaqarnera tunngavigalugu ataatsimut ingerlaarnermut tunngasut siusinnerusukku oqaatigineqarsimasut ataatsimiititaliap aamma peersimavai, taakkumi UKA 2017/29-ip suliarinerani Unammilleqatigiinneq pillugu Inatsimmut nuunneqarnikummata.

Nuussineq taanna naapertorlugu allannguutissatut siunnersuut una Atuisartoqarnermut Unammilleqatigiinnermullu Aqutsisoqarfimmut pilertorluinnartumik tusarniaassutigineqarpoq. Atuisartoqarnermut Unammilleqatigiinnermullu Aqutsisoqarfik nalunaarpoq, taama siviikitsigisumik piffissaliineq pissutigalugu itisiliinissamut periarfissaqannginnerarluni, tuaviortumilli iliuuseqarnikkut Aqutsisoqarfik siunnersuummut oqaaseqaatissaqarsimanngilaq.

Sanaartornermut ataatsimiititaliap missingiutaa Naalackersuisut TELE-POST-imut tusarniaassutigimmassuk, taakku uparuarpaat ataatsimiititaliap siunnersuutaata periuseq atuutereersuq qaangerlugu ammaassineq annertusineqassasoq. Taamaattumik Naalackersuisut siunnersuutigissavaat attaveqaatigiinnikkut ammaassineq illoqarfiit nunaqarfiillu iluini atuuttussanngorlugu killilerneqassasoq. Radiukku TV-kullu aallakaatitanik siammarterisarneq

allanngorani TELE-POSTip attaveqaqatigiinnermut ataatsimoortumik atugassiissutaata ilaanik pisisarnikkut.

Allannguutissatuut siunnersuutip aalajangersartagaannut ataasiakkaanut nassuiaatit

Normu 1-imut

Imm. 1-imut

Kalaallit Nunaanni Namminersorlutik Oqartussat kisermaassisussaatitaaneranni immikkoortut ilaannik ammanerulersitsinissamik Naalackersuisut aalajangersakkakut piginnaatinneqarput.

Imm. 2-mut

Nalunaarasuartaateqarnermik peqqussummi atuuttumi § 2, imm. 1 innersuussutigalugu nalunaarasuartaateqarnermi kiffartuussivinni paasissutissat pillugit kiffartuussiviit aamma internetimik kiffartuussiviit pillugit nioqquteqartarnermi niuernerit Naalackersuisut 2009-mi 2014-imilu aalajangiinerisigut ammanerulersinneqarput.

Inatsisissap uuma akuersissutigineqarneratigut nalunaarasuartaateqarnermi kiffartuussivik radiukkut TV-kullu aallakaatitat ammanerulersinneqarpoq. Nalunaarasuartaateqarnermik kiffartuussivikkut radiukkut TV-kullu aallakaatitat sumiiffimmiit ataatsimit (napparummiit) tiguisussanut arlalinnut siaruarsinnaanerit (broadcast) periarfissaalerpoq. Matumani pineqarpoq immikkoortumit ataatsimit immikkoortunut amerlasuunut nalunaarasuartaateqarnikkut kiffartuussineq.

Ukiuni arlaqartuni ileqqusimavoq taamatut siaruarterisarnermik kiffartuussiviup najukkami radioqarfinit TV-qarfinnillu akuersissutaatilimmit pisiarisarnera, amerlanerujartuinnartulli taamatut kiffartuussivimmit namminneq nioqquteqartalersinnaanissartik kissaatigaat. Siunnersuutikkut ileqqoq tamanna inatsisitigut tunngavissinneqarpoq.

Imm. 3-mut

Nalunaarasuartaateqarnermik attaveqaqatigiinnermi silaannakkut aallakaatitsinnermut atortunik nioqquteqartarnerit Naalackersuisut 2009-mi aalajangiinerisigut ammanerulersinneqarput. Attaveqaqatigiinnermi atortut nioqquteqartup atuisullu akornanni attaveqarsinnaanermut atorpeqassapput. Matumani pineqartut assersuutigalugu tassaapput attaveqaatit wifi, Wimax, FWA, 4G imaluunniit 5G. Attaveqaqatigiinnermi atortut assigiissutigaat, paasissutissat sumiiffiit marluk akornanni nassiunneqarsinnaassammata, assersuutigalugu nioqquteqartumiit napparut nassitsissut atorlugu, pisisumiillu tigooraavik atorlugu.

Inatsisissap uuma akuersissutigineratigut nalunaarasuartaateqarnermik kiffartuussineq radiukkut TV-kullu aallakaatitanik siaruarterinermi nioqquteqarneq nalunaarasuartaateqarnermi attaveqaataasoq ammanerulersinneqarpoq. Matumani pineqarpoq satellitti aqutigalugu attaveqaatigiinneq, tassuunakkullu radiukkut TV-kullu aallakaatitanik tigooraasinnaaneq periarfissiissutigineqarpoq, kiisalu attaveqaatigiinnermi atortut atorlugit illoqarfiit nunaqarfiilluunniit ataasiakkaat iluanni aallakaatitanik siaruarterisinnaaneq.

Ukiuni arlaqartuni ileqquunikuvoq radiukkut TV-kulluunniit aallakaatitanik tiguisinnaanissamut najukkami radioqarfiit TV-qarfiillu tigooraanerannut, kiisalu satelittikkut tigooraassutinik atortuutinik pilersitsisarnerat ingerlataqartarnerat siammarterisarnerallu. Siunnersuutikkut ileqqoq tamanna inatsisitigut tunngavissinneqarpoq.

Imm. 4-mut

Aalajangersakkami erseqqissaatigineqarpoq imm. 1 naapertorlugu attaveqaatigiinnermi atortut tassaasut radiumut sakkortusaaviit (radiokæder), satellitimut attaveqaatit, kabelitigut aamma paasisutissat ingerlaarnerinut kiffartuussiviit ammanerulersitsineramik periarfissaqarnermut ilaatinneqanngitsut. Elektronik atorlugu attaveqarnerit tassaapput radiukkut nalunaarasuaatigulluunniit attaveqaateqarnermi teknikki imaluunniit pilersuisut atuisullu akornanni attaveqaatit naapiffii (nettermineringspunkter) iluaqusiullugit nipimik, assinik, oqaasertaliussanik imal. taakku ataatsikkut paarlakaaajallugit atornerisigut elektroniskiusumik tamakkiisumik ilaannakortumilluunniit nassiussisinnaaneq.

Imm. 5-imut

Aalajangersakkami illoqarfiup nunaqarfiilluunniit iluani silaannakkut attaveqaatinik atuinissamik ammanerulersitsinissamut Naalakkersuisut aamma piginnaatinneqarput. Illoqarfiit nunaqarfiillu akornanni silaannakkut attaveqaatit atornissaannut ammaassinissamut periarfissaqartoqarnaviangilaq. Tamatumani attaveqaatigiinnissamut akuersissutaateqareersoq atorneqassaaq.

Nioqquteqartartup silaannakkut attaveqaammik nammineerluni pilersitsisinnaaneranut piumasqaatit marluupput. Siullertut pineqartoq tassaassaaq sumiiffimmiit sumiiffimmut imaluunniit sumiiffimmiit sumiiffinnut arlariinnut silaannakkut attaveqaat. Pissutsit immikkut ittu pineqanngikkaangata fiberimik kabelimilluunniit attaviliisoqarsinnaanngilaq, taamaaliortoqassappallu Nalunaarasuartaateqarnermik Aqutsisoqarfiup immikkut ittumik akuersissut nalunaarutigissavaa. Aappaattut silaannakkut attaveqaat illoqarfiup nunaqarfiilluunniit iluani taamaallaat pilersinneqarsinnaavoq. Tamatumani tunngaviuvoq nalunaarasuartaateqarnikkut attaveqarnermik attaveqaatigiinnermut inuiaqatigiinnit aningaasaliissutaareersimasut pitsaanerpaamik atorneqarsinnaaner at eqqarsaataasariaqarmat.

Suliffeqarfiup namminerisamik attaveqaataasa imminnut ataqatigiilersinnaaner at siunertaralugu assersuutigalugu suliffeqarfik illuni sanileriinni inissisimappat illut marlut akornanni kabelinik

attaveqaasiorsinnaaneq periarfissaavoq, pissutsinilu taamaattuni kabelit atorlugit attaveqaammik pilersitsinissamut immikkut ittumik akuersissuteqartoqarsinnaavoq. Illoqarfimmi nunaqarfimmiluunniit pineqartumi suliffeqarfiup arlariinnik illuuteqarnera pissutiginnarlugu attaveqaqatigiinnermut atortunik annertuunik pilersitsinissamut taamaalilluni immikkut ittumik akuersissummik tunniussisoqarsinnaassanngilaq.

Ataatsikkut illoqatigiittoqartillugu, nioqquteqartartut allat akuersissutaateqartup illuutaani atortunik inissiimatillugit, kabeli atorlugu attaveqaasiinnaanermut immikkut ittumik akuersissummik aamma tunniussisoqarsinnaavoq.

Imm. 6-imut

Ammanerulersitsineq pillugu Naalackersuisut annertunerusumik maleruagassiorsinnaanerannik aalajangersagaq kinguneqassaaq. Assersuutigalugu makku pillugit maleruagassiorortoqarsinnaavoq:

- Nioqquteqartartup nalunaarasuartarnermut attaveqaataanik atuinissaanut maleruagassanik aalajangersaasoqarsinnaavoq
- Normuutigineqartunut ataatsimoorussanut killilinnullu periarfissaqarnermi aqutsinerup killiliinerulluunniit isumannaarneqarnissaa.

Taagorneqartut tamarmiunngillat.

Allannguinermi niuernerit tamakku killilersorneqarnerat Atuisartoqarnermut Unammilleqatigiinnermullu Aqutsisoqarfimmut Unammilleqatigiinneq pillugu inatsit naapertorlugu nuunneqarsimmamata, inatsit una malillugu peqatigiilluni ataatsimut atuisitsinnaatitsinnermut aamma internetimut periarfissaqarnermut Naalackersuisut maleruagassanik aalajangersaanngillat.